

LISTOVI

GRAČANIČKI GLASNIK
časopis za kulturnu historiju

Broj 56
Godina XXVIII
Novembar, 2023.
[str. 327-340]

© Monos 2023

LISTOVI...

Listovi gračaničkog kalendara od 9. 5. 2023. do 14. 12. 2023.

Prof. dr. Omer Hamzić

9. 5. 2023.

U Gračanici svečano obilježen 9. maj: Dan pobjede, Dan Zlatnih ljiljana i Dan Evrope

Tim povodom položeno je cvijeće i odata počast na Spomen-kosturnici borcima NOR-a i pred Spomen-bistom Josipa Broza Tita, te na Centralnom spomen-obilježju Odbrambeno-oslobodilačkog rata 1992. – 1995. Pred Centralnim spomen obilježjem prigodne govore održali su gradonačelnik Nusret Helić i predsjednik Organizacije porodica šehida i poginulih boraca Sadržmir Džebo. U kulturnom umjetničkom programu nastupio je kvartet i Hor Muzičke škole iz Gračanice.

13. 5. 2023.

Izvještaj sa 24. festivala dječijeg teatra BiH u Gračanici

Organizatori su i ove godine bili Centar za dramski odgoj iz Mostara i BKC Gračanica. Za tri dana Festivala pozorišnom scenom BKC prodefilovalo je više od stotinu mladih umjetnika, budućih glumaca i glumica. Stručni žiri radio je u sljedećem sastavu: **Žiri** su činili Hristina Mouratidou (glumica, dramski i teatarski pedagog), Armin Joha Hadžimušić (glumac i dramski i teatarski pedagog) i Mirela Trepanić Grbešić (režiserka). Nakon 9 izvedenih predstava, odlukom **Žirija za najbolje predstave (u cjelini)**, proglašene su predstave "Patuljak tajnog imena" u izvedbi Dječjeg pozorišta „Eko Art“ Bugojno i "Ako je vjerovati mojoj baki" u izvedbi dramskog ansambla OŠ „Sveti Franjo“ iz Tuzle. Pored pobjedničkih, žiri je dodijelio još desetak specijalnih priznanja. Tako je *nagrada za socijalno angažirani teatar* **dodijeljena** predstavi „Smrt je moja ljubav“ mostarskog „Teatra mladih“; *nagradu za radost igre* ravnopravno su ponijele predstave „Gospođica neću“ KŠC „Sveti Josip“ Sarajevo, „Priče o biberčici i palčici ili kako se raste“ OŠ „Hasan Kikić“ i KUD „Adem Alić“ iz Gračanice i „Ježeva kućica“ Sedma

osnovna škola Blažuj-Ilidža; *Nagrada za kostime* dodijeljena je predstavama „Ako je vjerovati mojoj baki” OŠ „Sveti Franjo” iz Tuzle i „Zeleni putnik” Dramskog studija „Ankata” Kalesija; *Nagrada za ritam igre* **dodijeljena je predstavi** „Šašava ordinacija” u izvedbi Kulturne scene „Male stvari” Trebinje; *Glumačke nagrade* dodijeljene su ravnopravno: Amaru Hediću za ulogu **Đepeta** u predstavi „Pinokio” Pozorišta mladih Tuzla, Adijanu Žuniću za ulogu Zlog Vilenjaka u predstavi „Ako je vjerovati mojoj baki” OŠ „Sveti Franjo” iz Tuzle, Jasmini Velagić za ulogu Mlinareve **kćerke u predstavi „Patuljak tajnog imena”** Dječijeg pozorišta „Eko Art” iz Bugojna; *Glumačke pohvale* dodijeljene su ravnopravno: Vedadu Naimkadiću za ulogu Lisice u predstavi „Pinokio” Pozorišta mladih Tuzla, Mirni Nakić za ulogu Mrvice u predstavi „Ako je vjerovati mojoj baki” OŠ „Sveti Franjo” iz Tuzle, Ivi Lučić za ulogu Patuljka u predstavi „Patuljak tajnog imena” Dječijeg pozorišta „Eko Art” iz Bugojna, Kenanu Muratoviću za ulogu Zeca Poštara u predstavi „Ježeva kućica” Sedma osnovna škola Blažuj-Ilidža; *Dječiji žiri* je jednoglasno dodijelio nagradu za najbolju predstavu, „Patuljak tajnog imena” Dječijeg pozorišta „Eko Art” iz Bugojna.

15. 5. 2023.

Obilježen Dan civilnih žrtava rata grada Gračanica

Obilježavanje se organizuje svake godine na dan pogibije Adema Mustajbašića, pripadnika Civilne zaštite, 1992. godine koji se službeno proglašen prvom civilnom žrtvom rata na području tadašnje opštine Gračanica. Prigodne govore na spomen-obilježju civilnim *žrtvama* rata na Bijelim Poljima održali su gradonačelnik Helić i Sead Begović, predsjednik organizacije Civilnih žrtava rata. Nakon polaganja cvijeća na spomen-obilježju na Bijelim Poljima, boračke delegacije položile su cvijeće i na mezar Adema Mustajbašića i grob

Ivane Đorđević, najmlađe civilne žrtve na Pravoslavnom groblju u Varoši.

16. 5. 2023.

Tematska sjednica Gradskog vijeća Gračanica: na tapetu bolesti zdravstva

Sve izraženiji problem nedostatka stručnog ljekarskog kadra zbog višegodišnjeg izostajanja specijalizacije samo je jedan od uzroka opadanja nivoa zdravstvenih usluga u Općoj bolnici i Donu zdravlja Gračanica i sve češće reakcije građana na, generalno, loše stanje u tim ustanovama. To je i povod za sazivanje vanredne sjednice Gradskog vijeća koje je trebalo da pomogne u prevazilaženju tih problema. Na sjednicu su pozvani predstavnici upravljačkih struktura i sindikata tih ustanova, te Kanalnog zavoda za zdravstvenu zaštitu i Ministarstva zdravstva TK. Na sjednici su se mogle čuti potpuno oprečne ocjene stanja u zdravstvu Gračanice. Predstavnici sindikata stanje su opisivali dramatičnim, a menadžment i upravljačka struktura gotovo normalnim za ovako nenormalne uslove. Ministar zdravstva nije se ni pojavio na sjednici već je javio pismom da ima prečeg posla, dok je direktor kantonalnog zavoda zdravstva dao kratku pouku vijećnicima kako se financira zdravstvo na Kantonu. Nakon višesatnog razglabanja „situacije”, kako su izvijestili lokalni mediji, Vijeće je usvojilo zaključak da menadžment Doma zdravlja sa sindikatom sačini prijedlog mjera i prioriteta i u roku od 15 dana uputi prema Gradskom vijeću, te da se od Ministarstva zdravstva TK i Upravnog odbora Opće bolnice Gračanica traži što brže imenovanje direktora opće bolnice. Da li će ovo biti dovoljna terapija za oboljelo lokalno zdravstvo? Možda.

25. 5. 2023.

Svečano obilježen Dan odbrane Gračanice.

Tim povodom gradonačelnik je upriličio tradicionalni prijem za nosioce najviših

boračkih priznanja „Zlatni ljiljan“, nakon čega je obilježavanje nastavljeno na Centralnom spomen-obilježju Odbrambeno-oslobodilačkog rata 1992.-1995. u Gračanici. Prvo je pred okupljenim građanima prigodan referat pročitao Gradonačelnik Nusret Helić, a potom je emotivan govor održao prof. dr. Omer Hamzić, otac poginulog dječaka u granatiranju Gračanice, 1993. godine direktno optuživši Tužilaštvo Tuzlanskog kantona za opstrukciju i nerad zato što do sada nije podiglo ni jednu optužnicu za ubijene civile po Gračanici tokom rata 1992. – 1995. (osim jedne za ubijenog civila srpske nacionalnosti). Nakon ovih obraćanja, pred spomenikom je izveden prigodan kulturno-umjetnički program, a zvanične boračke i druge delegacije položile su cvijeće. Dan ranije organizovan je tradicionalni omladinski marš na Zečev gaj, poprište krvave bitke, u kojoj je, 25. 5. 1992. godine, poginulo devet branilaca Gračanice.

30. 5. 2023.

Održana 28. sjednica Gradskog vijeća: odluka o priznanjima i kadrovska rješenja...

... po nekim mjesnim zajednicama (članovi vijeća mjesnih zajednica Babići, Donja Lohinja) i Javnom preduzeću „Vodovod i kanalizacija (član Nadzornog odbora). Usvojen su i izvještaji: o radu Gradskog pravobranilaštva za 2022. godinu, o provedenim podsticajnim mjerama i njihovim efektima u poljoprivredi na području grada Gračanica, o radu i finansijskom poslovanju, JP „Komus“ Gračanica za 2022. godinu, te informacije: o prikupljanju i odlaganju komunalnog otpada iz domaćinstava i privrednih subjekata, o radu i vršenju nadzora gradske inspekcije za 2022. godinu i informacija o zbrinjavanju napuštenih i izgubljenih životinja (pasa lutilica) na području grada Gračanica

2. 6. 2023.

Dan grada: skromno–bez presijecanja vrpce i otvaranja novih objekata

Položeno je cvijeće na spomen obilježja u centru grada, a potom održana svečana akademija, sa gostima iz Kantona (dva ministra i premijer Halilagić) i bratskog francuskog grada Flori Lezobre. Prvo se kratko obratio Gradonačelnik Helić, a zatim su prisutni odgledali prigodan dokumentarac Fahrudina Kurtovića o rezultatima i uspjesima lokalne vlasti u proteklih godinu dana. Potom je predsjedavajući Gradskog vijeća Mirnes Topčagić uručio Zlatne značke Grada Tevhidi Hegić iz Sokola, Zijadu Kapetanoviću iz Donje Lohinje i Azizu Bešiću iz Babići, dok je Gradonačelnik Helić uručio Zlatne plakete Grada Humanitarnom udruženju „Ajnur Mujić“ Gornja Orahovica i preduzeću „Ingrat“ Gračanica.

3. 6. 2023.

Novo u „Variplastu“: nabavljena savremena mašina za proizvodnju polietilenske folije na bio bazi

Gračanički „Variplast“ je jedna od vodećih kompanija za preradu plastike na regiji, koja ove godine obilježava 40 godina svog postojanja i rada. Osnivač firme, rahm. Mustafa Hasić počeo je 1983. godine sa skromnim sredstvima i sa nekoliko polovnih mašina u preuređenom garažnom prostoru u Malešićima. Danas je to moderna kompanija sa 88 zaposlenih na čijem je čelu već desetak godina njegov sin Mujo, menadžer sa vizijom, ugledni član Udruženja poslodavaca u Gračanici. Kompanija je opremljena savremenim mašinama, raspolaže sa 12 hiljada kvadratnih metara proizvodnog prostora na tri lokacije u Gračanici, ima i vlastiti pogon reciklaže. Zahvaljujući kvalitetu proizvodnje, firma je ostvarila solidnu poziciju na tržištu i kontinuirano postiže dobre poslovne rezultate, posebno u izvozu. Tako je u 2022. godini od ukupne proizvodnje, 30 posto vrećica

za široku potrošnju i vrećica za pakovanje voća i povrća, izvezeno na tržište Evropske Unije.

Da bi povećali izvoz i dostigli evropske zahtjeve i standarde u proizvodnji (posebno ekološke), početkom maja, vlastitim sredstvima i nešto iz kredita nabavili su najsavremeniji stroj za proizvodnju polietilenske folije na bio bazi i platili ga 1,5 miliona maraka. Tako skupu opremu posjeduju još samo dvije firme u Bosni i Hercegovini.

U svojoj izjavi za „Dnevni avaz“ direktor Hasić najavio je nova ulaganja u osavremenjavanje proizvodnje u preradi plastike u visini od 4,5 miliona maraka. Vrijedno je napomenuti da se u sklopu firme „Variplast“ nalazi i pogon reciklaže

4. 6. 2023.

Planinarski susreti „Gračaničkim stazama“ u organizaciji Planinarskog društva „Zefir“

Ovo društvo nije do sada imalo svojih susreta, svoj dan, i mi smo, evo, ove godine riješili da to organizujemo. – istakao je za medije Ševal Marmarac, član uprave PD „Zefir“ i predsjednik Organizacionog odbora. Pored planinara i drugih zaljubljenika u prirodu iz Gračanice, na ovim prvim susretima učešće su uzeli članovi nekoliko planinarskih društava s prostora sjeveroistočne Bosne, pa i šire (iz Odžaka, Srebrenika, Lukavca, Tuzle, Živinica, Banovića, Vogošće, Kozarca). Okupljanje učesnika je bilo u Gračanici, a planinari su se nakon toga zaputili prema polaznim tačkama pohoda, koji se odvijao na dvije staze u rejonu planine Trebave (dužine 8 i 15 km), a potom je upriličeno druženje na izletištu Vis, pored istoimene planinarske kuće. Prema informaciji organizatora bilo je odazvalo se oko 250 učesnika, od čega je njih oko 230 prešlo planirane staze od početka do kraja. U organizaciji manifestacije nije bilo nikakvih problema, pa u PD „Zefir, planiraju još bolje Susrete naredne godine, u želji da postanu tradicionalni.

Inače, Planinarski susreti „Gračaničkim stazama“ organizovani su u okviru obilježavanja 2. juna – Dana grada Gračanica, koji je bio i generalni pokrovitelj, a organizaciju je podržala i Turistička zajednica grada Gračanica. (Radio Kameleon)

7. 6. 2023.

Promocija 55 broja Gračaničkog glasnika: u znaku Gradskog muzeja Gračanica

Ovaj broj Časopisa otvara se rubrikom „Povodom“ u kojoj Edin Šaković piše o perspektivi razvoja „Gradskog muzeja“ nakon njegovog pravnog utemeljenja u Statutu Bosanskog kulturnog centra Gračanica. To je i bio povod za pisanje ovog dosta opširnog priloga. Na istu temu piše i prof. dr. Esad Delibašić, konkretnije o društvenom značaju i ulozi muzeja. S obzirom da je muzejska djelatnost u Gračanici, na neki način tema ovog broja, glavna gošća promocije bila je Mensura Mujkanović, direktorica Gradskog muzeja Tešanj, koja je iznijela neka svoja iskustva u muzejskoj djelatnosti i poželjela uspjeh Gradskom muzeju u Gračanici. Posebno je istakla ulogu i značaj „Gračaničkog glasnika“, kao podloge za razvoj muzeja: „Mi u Tešnju imamo muzej, ali nam fali „Gračanički glasnik“. Ovaj broj časopisa promisivao je kao gost dr. sc., Dževad Drino, redovni profesor Pravnog fakulteta u Zenici, koji je u svom obraćanju rekao i ovo: „Povijest nam nabraja mrtve jezike–sanskrt, starogrčki, latinski, staroslavenski, sumerski..., ali i narode koji su nestali–Etrušćani, Skiti, Hetiti, Feničani, Hazari...umalo se nisu na ovu listu dodali bosanski jezik i Bošnjani! Stoga se pisana riječ u Bošnjaka mora staviti na stepenicu više, jezik pažljivo negovati, a ovakva pisana tradicija što se radom saradnika, nataložila u „Gračanički glasnik“, staviti na zaslužno mjesto u kulturnoj povijesti grada i regije. Gračanica nije više samo mjesto gdje ljudi vrijedno rade i dobro žive, gdje se dobro jede i još bo-

lje popije, gdje je dobra voda, čista hava i zdrava okolina–razvoj grada nosi nove iza-zove! Gračanica danas izdaje bolji časopis za kulturu nego i Tuzla i Doboj zajedno, slikari i književnici više nisu lokalni eks-centrici, nikakvo lokalno čudo, gdje i sport svakako spada u oblast ljudske nadgradnje, gdje i sutrašnjica donosi gradski muzej–jer, grad koji nema muzeja nije grad, to je kulturna provincija bez obzira koliko ima stanovnika.“

12. 7. 2023.

Održana 29. sjednica Gradskog vijeća Gračanica: Strategija za smanjenje energetskog siromaštva, zapošljavanje pripravnika, stipendije, izvještaji...

U Bosni i Hercegovini ne postoji jasna definicija energetskog siromaštva, kao ni metodologija i indikatori za utvrđivanje i praćenje energetskog siromaštva, tako da ne postoji ni regulatorni okvir za njegovo suzbijanje. Cijene električne energije i energije za grijanje su znatno uvećane u toku posljednje dvije godine, a očekuje se da će u narednim godinama troškovi električne energije i energije za grijanje značajno porasti u BiH i mnogo će više ljudi iskusiti energetsko siromaštvo u različitim stupnjevima, a najviše će biti pogođene siromašne i socijalno ugrožene kategorije stanovništva. Strategijom za smanjenje energetskog siromaštva, usvojenom na ovoj sjednici, predložene su i dugoročne mjere i zadaci Gradske uprave i drugih subjekata na pružanju pomoći najsiromašnijim kategorijama u nabavci i snabdijevanju energijom. Osim Strategije za smanjenje energetskog siromaštva (koja je usvojena bez veće rasprave), vijeće je usvojilo i dvije važne odluke: Odluku o obavljanju stručnog osposobljavanja nezaposlenih osoba visoke stručne spreme s područja grada Gračanica u organu uprave i pravnim subjektima iz javnog i privatnog sektora (popularno: pripravnčki staž), po kojoj se obezbjeđuje

obavljanje stručnog osposobljavanja za 31 lice visoke stručne spreme u osnovnim i srednjim školama i javnom sektoru koji su iskazali zainteresovanost da učestvuju u ovom projektu. Na osnovu Odluke o broju i visini stipendija za učenike srednjih škola i studenata u školskoj 2023/2024 godini dodijelit će se 123 stipendije, od kojih 23 djeci iz porodica demobilisanih boraca, 19 djeci iz porodica ratnih vojnih invalida, 19 nadarenim učenicima i studentima, 17 učenicima i studentima u deficitarnim zanimanjima i 29 učenicima i studentima iz porodica slabijeg imovnog stanja. Stipendije će se dodijeliti i svim učenicima i studentima koji ostvare isti broj bodova u okviru iste kategorije i svim studentima medicinskog fakulteta, budućim ljekarima, kao posebnom deficitarnom zanimanju. Iznos godišnje stipendije je dosta skroman: za studente 1.600,00 KM, a za učenike srednjih škola 1.000,00 KM. U nastavku sjednice, vijećnici su dali saglasnost na Odluku o povećanju cijene usluga JU Dječije obdanište „Naša djeca“ te na Odluku o izmjenama i dopunama Statuta JP „Vodovod i kanalizacija“ d.o.o. Gračanica čiji je Izvještaj o radu i finansijskom poslovanju također usvojen jednoglasno.

Nakon kraće rasprave, Izvještaj o radu i finansijskom poslovanju JP „Veterinarska stanica“ d.o.o. za 2022. godinu usvojen je većinom glasova sa zaključkom da se za sljedeću godinu pripremi i revizorski izvještaj. Takođe je usvojen i Izvještaj o realizaciji projekata u 2022. godinu iz programa kapitalnih investicija grada Gračanica sa planom realizacije 2021. – 2025. godina.

U informacijskom dijelu sjednice, Gradsko vijeće je primilo k znanju Informaciju o radu općinskog suda u Gračanici za 2022. godinu, Informaciju o stanju bezbjednosti na području grada te Informaciju o stanju javne rasvjete u kojoj se zatražilo preispitivanje Odluke o javnoj rasvjeti na nekoj od narednih sjednica.

7. 8. 2023.**Obilježena godišnjica bitke na Visu**

Program obilježavanja počeo je u petak, 4. augusta, učenjem Jasina i dove šehidima i poginulim borcima u džamiji Mustafići. Istog dana na izletištu Vis upriličena su tradicionalna biračka druženja. Centralnoj manifestaciji prethodilo je polaganje cvijeća na Centralnom spomen-obilježju u Gračanici i spomen obilježju šehidima i poginulim borcima u MZ Babići. O značaju pobjede na Visu su govorili Grado-načelnik Nusret Helić, dobitnik najvećeg ratnog priznanja „Zlatni ljiljan“ Fikret Okanović – Okan i Smajo ef. Mustafić. U revijalnom dijelu programa nastupila je sopranistica Dženana Huseinagić izvedbom pjesama „Zemljo moja“ i „S one strane Plive“. Zbog vremenskih neprilika, malonogometni noćni turnir mjesnih zajednica koji je bio predviđen za 5. august odgođen je za 9. august, dok je turnir u odbojci na pijesku odgođen za 12. august.

17. 8. 2023.**Umro veliki bosanskohercegovački i crnogorski književnik Marko Vešović**

Rođen je 1945. godine u selu Pape kod Bijelog Polja u Crnoj Gori. Gimnaziju je završio u Bijelom Polju, Filozofski fakultet u Sarajevu, a postdiplomski studij na Filološkom fakultetu u Beogradu. Nakon studija, radio je kao srednjoškolski profesor, a zatim desetak godina i kao profesor na Filozofskom Fakultetu u Sarajevu. Niz godina bio je urednik u Izdavačkoj kući „Veselin Masleša“. Na Filozofski fakultet u Sarajevu vratio se 1992. godine, gdje je u međuvremenu i doktorirao. Rat je proveo u Sarajevu. „Prije ovoga rata ja nisam previše osjećao Sarajevo. Trebalo mi je da mi bosanska prijestolnica pokaže svoje rane i da smjesta postane moj rodni grad. Nesreća izjednačuje ljude–svi smo mi ustravljena živinčad, koja svaki dan očekuje da od njenog mesa Karadžićevo topništvo napravi nadrealističke kolače. Postali smo braća po

čekanju granata, po drhtanju pred eksplozijama, po utrobnom strahu za svoju djecu, čije plačeve ni Bog s nebesa ne bi mogao podijeliti na srpske, hrvatske i muslimanske“, napisao je Marko Vešović u jednom od svojih tekstova. Objavio je preko 30 knjiga poezije i proze, pjesničkih prevoda, esejistike i polemika. Najznačajnija njegova djela su: „Poljska konjica“, „Nedjelja“, „Osmatračnica“, „Rodonačelnik“, „Četvrti genij“, „Smrt je majstor iz Srbije“, „Kralj i olupina“. Svoje pjesme, prozu, kolumne i polemike, poslije rata objavljivao je u raznim listovima i časopisa. Između ostalih i jedan izbor pjesama iz „Desete knjige“ Gračanički glasnik, XXXI/16, 2011., 106 – 110) s k kojima je ušao u krug saradnika ovog časopisa.

30. 8. 2023**Održana 30. sjednica Gradskog vijeća Grada Gračanica: rebalans...**

Izmjenama i dopunama Budžet je uvećan za 3.639.579 KM. Shodno povećanju prihoda, a u skladu sa stanjem realizacije, došlo je do promjene i u rashodovnoj strani Budžeta. Kako je obrazložio Grado-načelnik Helić, „to je rezultat, prije svega, većeg prenesenog viška prihoda i primitaka u iznosu od 1.245.994 KM i većih procijenjenih planiranih poreznih prihoda u iznosu od 581.653 KM. Uglavnom se radi o povećanju prihoda po osnovu poreza na promet pravnih lica. Veći neporezni prihodi su za 701.085 KM. To se prije svega odnosi na uvrštenu rentu koja je bila na razgraničenju u iznosu od 450.000 KM, te većim prihodima po osnovu komunalnih taksi. Veći su i tekući grantovi i kapitalni – u iznosu od preko milion i sto hiljada KM.“ Vijećnici su razmatrali i polugodišnju realizaciju Budžeta Grada i polugodišnji utrošak budžetske rezerve za tekuću godinu. Za šest mjeseci ove godine budžetski prihod je ostvaren u iznosu od 9.672.721 KM ili 81,09% u odnosu na plan, što je u odnosu na isti period prošle godine više za

5,75%. U izvještajno-informativnom dijelu sjednice razmatran je i usvojen Izvještaja o radu Gradskog vijeća Gračanica i radnih tijela (komisija) u periodu od 01.01.-31.07.2023. godine i informacija o stanju putne infrastrukture na području Grada Gračanica.

1. 9. 2023.

Svečano obilježen Dan 111./221. gračaničke brigade

Osim na linijama odbrane oko Gračanice, borci ove brigade bili su i na ratištima od Gradačca, Brčkog, preko Doboj Istoka, Vareša i Olova, Sapne i Teoča, pa sve do Vozuće. Pristunim su se, na svečanosti isred Centralnog spomen obilježja obratili Nusret Helić, gradonačelnik Grada Gračanica i Ibrahim Nurić, nosilac priznanja „Zlatni ljiljan“, koji je pred okupljenim evocirao neke svoje boračke uspomene. Nakon polaganja cvijeća, pred spomenikom je izveden prigodan kulturno-umjetnički program

12. 9. 2023.

Nijaz Omerović: Umjetničko veče u Bosanskom kulturnom centru Tuzlanskog kantona u Tuzli

Pored izložbe slika, u okviru umjetničke večeri, obavljena je i promocija knjige poezije „Jed i med“, koju je autor predstavio kroz audio-vizuelnu projekciju. To je autorova četvrta knjiga u koju je prikupio stihove ispisane u u posljednjih 37 godina. „Ono što nisam mogao reći i izraziti kroz slike, ovdje sam rekao kroz stihove. Dvije udarne poeme u toj knjizi, na koje sam posebno ponosan su poema o Srebrenici „Majčina suza“ i poema o stradanju Bošnjaka u Višegradu u periodu 1942.-1945. i 1992.-1995. pod nazivom „Kameni svjedok“, rekao je za medije Omerović, najavivši ovu izložbu u istom formatu uskoro u Brčkom, a promociju knjige u Sarajevu. Deset dana nakon izložbe u Tuzli nastupio je i u BKC Gračanica (22. 9. 2023.) u sklopu programa pratećih manifestacija

gračaničkog sajma poduzetništva „Grapos-expo 23“.

20. – 23. 9. 2023.

Gračanica: održan 12. međunarodni sajam poduzetništva „Grapos-expo 2023“: Privreda i inovacije na jednom mjestu

Od ove godine vrijeme održavanja sajma pomjereno je sa dosadašnjeg proljetnog (april – maj) na jesenji termin. U pripremi sajma nije saopšteno zašto je došlo do pomjeranja termina. Sajam se održava u puno boljim uslovima na lokaciji kod Tržnog centra „Etna“ u industrijskoj zoni Gračanice, površine 5.000 m² zatvorenog i 3.000 m² otvorenog izložbenog prostora. I ove godine, kao organizatori, pojavljuje se Gradska uprava i Udruženje poslodavac, dok je „tehnički“ realizator sajma specijalizovana firma za sajmove „Boms expo“. U lokalnim medijima najavljen je kao najveći sajam poduzetništva i obrta u BiH, međunarodnog je karaktera i razvojno-edukativnog usmjerenja. Već se profilirao kao sajam dostignuća proizvodnog i uslužnog poduzetništva i obrta, starih i umjetničkih zanata te kvalitetnih uvjeta privređivanja iz okruženja koji doprinose razvoju poduzetništva i obrta. Koncept sajma je, kako su kazali organizatori, izmijenjen je u odnosu na prethodne godine, te je ove godine isključivo izložbenog karaktera, sa dominacijom proizvodnih firmi iz metalske, industrije hemije i nemetala, drvne, te građevinske industrije. Pred velikim brojem građana i izlagača, te medija i gostiju Grada, Sajam su otvorili premijer Vlade Federacije Bosne i Hercegovine Nermin Nikšić, ministar privrede TK Edin Duraković i domaćini – gradonačelnik Gračanice Nusret Helić i predsjednik Udruženja poslodavaca i samostalnih privrednika Mirsad Helić premijer. Na otvaranju je saopšteno da na sajmu učestvuje oko 150 izlagača, te da su izložbeni kapaciteti popunjeni. Prema ocjeni medija, ovo je bio jedan od najor-

ganiziranih sajмова do sada, a ovaj put je naglasak na promociji gračaničkih dostignuća u privredi, ali i izlagača iz inozemstva. Teško je izdvojiti koji su štandovi bili najprivlačniji, ali je činjenica da su roboti proizvedeni u gračaničkoj kompaniji "Metron" izazvali najveću pažnju posjetilaca. Firmu je 2019. osnovao mladi inženjer Asim Pedić, koja sada zapošljava 20 vrhunskih inženjera robotike „Do sada smo proizveli veće od 30 robota za bh tržište i tržište Slovenije, sada „napadamo“ Njemačku, traže nas. Vrijeme robotike je došlo, toga moramo biti svjesni – kazao Kako je izvijestio „Dnevni avaz“, gračanički robot je prvog dana sajma skuhao i posjetiteljima podijelio dva kilograma kafe.

Osim izložbenih aktivnosti, na sajmu bilo i niz prateći događaja: nekoliko zanimljivih prezentacija i panel diskusija o aktuelnim temama kao što su energetska tranzicija – lokalna perspektiva, dosadašnja iskustva i planovi, megatrendovi digitalnog marketinga itd.

22. 9. 2023.

Smotra folklora u Gračanici: učestvovalo sedam kulturno-umjetničkih društava

Pored izložbe slika Nijaza Omervića, jedna od pratećih manifestacija gračaničkog sajma poduzetništa „Grapos-expo 2023“ bila je i smotra folklora upriličena na rukometnom igralištu i u centru Gračanice. Prije zvaničnog nastupa, učesnici su imali i defile centrom grada, a nakon toga su na rukometnom igralištu izveli svoje svoje najbolje tačke. Na priredbi se predstavilo sedam kulturno-umjetničkih društava.: kulturno-umjetnička društva koja su uzela učešća na smotri folklora u Gračanici su: Lukavica, Sijedi krš Babići, Omladinski centar „Bosna art“ Stjepan Polje, „Mladost“ Malešići, „Ponos“, Pribava, „Podmtnjski behar“ Doborovci i Omladinski kulturni centar „Lipe“ iz Doboj Istoka.

3. 10. 2023.

Održana 31. sjednica Gradskog vijeća Gračanica: na zadnjem mjestu dnevnog reda Informacija o aktuelnim privrednim kretanjima na području grada Gračanica u 2022.

Nacrt Lokalnog akcionog plana za smanjenje energetske siromaštva 2023-2027. sa ove sjednice upućen je na javnu raspravu u narednih 30 dana, a usvojen je i Izvještaj o realizaciji Lokalnog akcionog plana zaštite životne sredine grada Gračanica (LEAP) za 2022. godinu i Evaluacija lokalnog akcionog plana zaštite životne sredine grada Gračanica za period 2012.-2022. godina. Radi se o vrlo opširnim materijalima, prenatrpanim velikim brojem tabela i pregleda s namjerom "da se akcije, koje su definisane u LEAP-u, prate i ažuriraju" i identifikuju prioritete za naredni period. Iako su svi ti pregledi jako nepregledni, ipak se u njima može vidjeti u koje su projekte ulagana sredstva iz gradskog budžeta u četiri sektora: sektor voda, sektor „tlo i otpad“, sektor „atmosfera i energija“ i sektor „biodiverzitet i kulturno historijsko nasljeđe“. Gradsko vijeće je bez rasprave „primilo je k znanju“ informaciju o legalizaciji bespravno izgrađenih objekata na području grada Gračanica (u prethodnih 12 mjeseci), iz koje se vidi da je bespravna izgradnja i dalje prisutna i da se poduzimaju mjere da se ta pojava smanji na minimum ili u potpunosti eliminiše. Na zadnjem mjestu u neki desetak tačaka dnevnog reda ove sjednice bila je Informacija o aktuelnim privrednim kretanjima na području grada Gračanica za prethodnu godinu, koja je takođe primljena k „znanju“. Po ovome bi se moglo zaključiti da je privreda (to jest ono od čega se živi) na margini interesovanja narodnih zastupnika, po čemu gračanički nisu izuzetak. Malo koga ovdje zanima činjenica da su u protekle dvije godine definitivno ugašene i na doboj prodane dvije nekada najmnogoljudnije firme u Grača-

nici: „Fortuna“ (27. 4. 2021.) i „Olimp“ (20. 1. 2022). To se čak u ovim materijalima i ne spominje. (napomena: u ovom broju našeg časopisa donosimo glavne akcente iz te informacije.)

8. 10. 2023.

Otvorena „Bosanska kuća“ u Babićima kod Gračanice

Kuća koja je stara oko 120 godina i bila je u vlasništvu Hadži Osmana ef. Mešanovića i njegove supruge Hanife. Kuća je bila načeta zubom vremena i počela se sama urušavati. Inicijativu za njenu obnovu pokrenuo je Senad Husić s ciljem da se u njoj otvori i mala muzejska zbirka. Pomogla je i mjesna zajednica, poduzetnici Babića, mještani. Dok se kuća obnavljala prikupljeni su i prvi eksponati (stari stan za tkanje, neki poljoprivredni alati i dr.) Ima i prostora za okupljanje, druženje, promocije knjiga, manje izložbe itd. Bosanska kuća ostaje i kao svojevrsan spomenik na starog hodžu Mešanovića, prvog vlasnika kuće, koji je ostao u lijepoj uspomeni ovog sela. O njemu je na otvaranju tog objekta nadahnuto govorio glavni imam Medžlisa Islamske zajednice Gračanica Smajo ef. Mustafić. Potomci ef. Mešanovića kuću-muzej su nakon njene obnove ustupili na korištenje Udruženju žena „Zlatne ruke“ iz Babića, koje će je znati koristiti, održavati i čuvati. (Prema „Dnevnom avazu od 8. 10. 2023. str. 13)

13. 10. 2023.

Sajam „Zlatne ruke Gračanice“ – po šesti put

Organizator sajma je Grad Gračanica u saradnji sa udruženjima žena s područja grada, Bosanskim kulturnim centrom, Vijećem mladih i obrazovnim ustanovama. Na svečanom otvorenju sajma, najmlađi sugrađani i učenici pripremili su kulturno-zabavni program a sajam je otvorio gradonačelnik Nusret Helić. Bila je to prilika da žene pokažu proizvode svojih vještina, te vještine u njihovoj izradi... Ove godine, osim gračaničkih udruženja

žena, učestvovala su i udruženja iz Kalesije, Srebrenika, Banovića, Tinje, Zavidovića, Lukavca i dr. Upriličena je i tradicionalna zajednička kafa sa predsjednicama udruženja te su im ovom prilikom dodijeljene i zahvalnice za učešće na sajmu.

26. 10 2023.

Izvršena primopredaja izvedenih radova na projektu „Sanacija puteva u ruralnim područjima Gračanice“.

Ovim projektom sanirane su dionice puta: Karići-Delići, Alići-Borik te Metaljica – Oštrikovac koje povezuju MZ Škahovicu i MZ Soko. Vrijednost ugovora je 199.122,30 KM a projekat je finansiran sredstvima International Fund of Agriculture Development (IFAD) (50%) čiju implementaciju koordinira Ured za koordinaciju projekata – PCU i Grada Gračanice (50%). Partneri na projektu su ZZ „Gračanka“ i Poljoprivredni klaster III dok je izvođač radova „Roding“ d.o.o. U okviru današnjeg sastanka iskazano je zadovoljstvo na saradnji te su najavljeni novi projekti na koji će Grad Gračanica moći aplicirati u narednom periodu.

16. 10. 2023.

Međunarodni dječiji festival „Vezeni most“, 20. izdanje – u Gračanici...

...okupio je mališane sa cijelog područja grada Gračanica i pružio im mogućnost da se u direktnom kontaktu upoznaju i druže sa poznatim domaćim književnicima, umjetnicima, glumcima i autorima.. Pozorišne predstave „Leteća gitara“ i „Hoću kući“ su autorske, a svi umjetnici su dobitnici više nagrada koje su dobijali na domaćoj i inostranoj sceni. Osim dramskih, čitav dan je bio ispunjen bogatim kulturno-zabavnim sadržajima, uključujući i nekoliko edukativnih radionica. U okviru festivala održane su i kreativne radionice za osobe sa invaliditetom, a predstavljena je i audio knjiga autora Šime Ešića. Generalni pokrovitelj manifestacije je Grad Gračanica.

26. 10 2023.**Izvršena primopredaja izvedenih radova na projektu „Sanacija puteva u ruralnim područjima Gračanice“.**

Ovim projektom sanirane su dionice puta: Karići-Delići, Alići-Borik te Metaljica – Oštrikovac koje povezuju MZ Škahovicu i MZ Soko. Vrijednost ugovora je 199.122,30 KM a projekat je finansiran sredstvima International Fund of Agriculture Development (IFAD) (50%), čiju implementaciju koordinira Ured za koordinaciju projekata – PCU i sredstvima Grada Gračanice (50%). Partneri na projektu su ZZ „Gračanka“ i Poljoprivredni klaster III dok je izvođač radova bio „Roading“ d.o.o. Gračanica

7. 11. 2023.**Novo sanitetsko vozilo za Službu hitne medicinske pomoći Doma zdravlja Gračanica**

Vozilo je nabavljeno sredstvima Doma zdravlja Gračanica i uz pomoć Grada Gračanica. Novo vozilo dobro je opremljeno, a između ostalog u njemu se nalazi i defibrilator. Prema riječima šefa Službe hitne pomoći doktora Saše Operhala, novo vozilo će značajno pojačati vozni park koji je, inače, u prosjeku star 14 godina. U toku ove godine nabavljena su dva nova sanitetska vozila, a u planu je i treće u narednoj godini, čime se stvaraju preduslovi za kvalitetno pružanje usluga prve pomoći u ovoj medicinskoj ustanovi.

19. 11. 2023.**Izgrađen spomenik poginulim borcima i dječje igralište u Karićima (Mjesna zajednica Babići)**

Tim povodom održana je skromna svečanost kojoj su prisustvovali brojni mještani i gosti, između ostalih i gradonačelnik Helić. U prvom dijelu svečanosti, nakon intoniranja himne Bosne i Hercegovine, otkriveno je Spomen-obilježje četvorici borca-šehida, koji su dali svoje živote braneci Bosnu i Hercegovinu na Visu, iznad

Babića, 13. 4. 1994. godine. To su Husein Zahirović – Huska, Edin Zahirović – Edo, Fikret Imamović – Kiso i Mehmed Iljazović-Memo, čije je ime i dato ovom dječjem igralištu. Izgradnja ovih objekata finansirana je iz gradskog budžeta i mjesne zajednice Babići. Pored gradonačelnika Helića, okupljenim građanima su se obratili: Sadržmir Avdić, predsjednik mjesne zajednice Babići, zatim Mehmed Mulahuseionović Meša, koji je vodio ovaj projekat od ideje do realizacije i napokon Huso Halilović, koji je poklonio zemljište za to igralište. U nastavku je izveden prigodan kulturno-umjetnički program i odigrana prva revijalna fudbalska utakmica.

22. 11. 2023.**U Galeriji portreta u Tuzli održan koncert pijaniste Bartolomeja Stankovića i svjetska praižvedba Toccate in C gračaničkog kompozitora Miralema Mejremića**

Koncert je održan povodom obilježavanja 90. obljetnice uglednog kompozitora savremene muzike Vojina Komadine, koji je duži niz godina radio kao profesor Harmonije i drugih stručnih predmeta na Srednjoj muzičkoj školi u Tuzli. Ostvarivao je veoma uspješnu saradnju sa Pionirskim pozorištem, KUD-om “Mitar Trifunović-Učo”, kao i Narodnim pozorištem u Tuzli. Od 1966. do 1975. godine bio je urednik muzičkog programa Radio-televizije Sarajevo. Za to vrijeme bio je angažovan i kao vanjski saradnik na Muzičkoj akademiji u Sarajevu, gdje je od 1975. do 1983. godine na stalnom angažmanu držao predmete Kompozicija i Orkestracija. Jedno vrijeme predavao je i u Podgorici (kasnije u Cetinju), a bio je i prvi dekan Muzičke akademije Univerziteta u Istočnom Sarajevu. Na koncertu održanom u Tuzli svoj bogat i stilski raznolik klavirski opus predstavio je pijanista Bartolomej Stanković. U drugom dijelu koncerta izvedena su i djela dvojice učenika Vojina Komadine – rahm.

Asima Horozića i Vojislava Ivanovića, kao i svjetska praižvedba Toccate in C za klavir, kompozitora mlađe generacije Miralema Mejremića iz Gračanice koju je upravo i posvetio svom nedavno preminulom prijatelju i profesoru, kompozitoru Asimu Horoziću. Dva dana kasnije sa istom kompozicijom Mejremić je nastupio i na koncertu u čast Komadine u Lukavcu.

25. 11. 2023.

Obilježavanje Dana Državnosti BiH u Gračanici...

...započelo je uobičajenom ceremonijom polaganja cvijeća na Spomen – kosturnicu borcima NOR-a, Bistu Josipa Broza Tita i na Centralno spomen-obilježje poginulim borcima/šehidima i civilnim žrtvama Odbrambeno-oslobodilačkog rata 1992.-1995. U jutarnjim satima, mališani iz obdaništa „Naša djeca“, uz pjesmu „Mojoj dragoj BiH“, prošetali su do gradskog parka gdje im je prigodne poklone uručio Gradonačelnik Helić. Istog dana održana je i svečana akademija u sali Muzičke škole, a kao i svake godine, organizovana je i tradicionalna šetnja do izletišta Vis u organizaciji Sportskog saveza Gračanica pod nazivom „Moja domovina – moj ponos“.Povodom Dana državnosti odigrano je i finale Kadetskog prvenstva grada Gračanica u šahu, te prvenstvo Grada u stonom tenisu.

30. 11. 2023.

Održana 33. sjednica Gradskog vijeća: za sport iz Budžeta Grada u 2022.

godini „transferisano“ 760.246,00KM, što je više za 74.504,00KM u odnosu na prethodnu godinu

To su podaci iz Informacije o stanju sporta na području grada Gračanice u 2022. godini, koja je jednoglasno usvojena uz ključak „da se pokušaju uvažiti zahtjevi za povećanje sredstava iz sportskih klubova u sljedećoj budžetskoj godini“. Inače, realizacija prihoda u Budžetu grada za prva tri kvartala ove godine bilježi značajan podbačaj. U ovom periodu u budžetsku kasu

prikupljeno je nešto manje od 14 miliona KM, što je nekih 67,8% u odnosu na plan. Vijećnici su, po običaju, izrazili nadu da će se stanje „popeglati“ do kraja budžetske godine. Spomenimo još da je odluka poprilično rogovatnog naziva „o utvrđivanju standarda i kriterija za imenovanja/nominiranja na upražnjene pozicije u reguliranim organima Grada Gračanica“ iz forme prijedloga „vraćena“ u nacrt. Osim informacije o sportu, iz dnevnog reda ove sjednice vrijedne spomena su još dvije informacije. Prva je o „realizaciji projekata koji su finansirani sredstvima viših nivoa vlasti i međunarodnih donatora u periodu 1. 1. – 31. 12. 2022.“ iz koje se vidi da je iz gradske uprave aplicirano sa 33 projekta, od kojih su za 17 odobrena sredstva u ukupnom iznosu od 3.245.883,1. Uz učešće Budžeta Grada u iznosu od 1.051.539,8 KM, ukupna vrijednost ulaganja u tih 17 projekata iznosi 4.297.423,0 KM. Da li je moglo više, može se samo nagađati. Druga vrijedna pažnje je informacija o javnom prevozu putnika na području grada Gračanica. Javni prijevoz putnika u linijskom prijevozu obavljaju tri firme: „Avis“ d.o.o., Gračanica, „Juppi tours“ d.o.o. Gračanica i „Kalabria turs“ d.o.o. Gračanica. Svi zajedno raspoložu sa ukupno 36 vozničkih jedinica (20 autobusa, 11 minibusa i 5 kombi vozila). Trenutno je aktivno i 16 taksi prijevoznika koji su raspoređeni na taksi stajalištima, čiji je kapacitet 18 mjesta. Izmjешtanjem autobuske stanice iz centra grada na periferiju, ukazala se potreba za organizovanjem gradskih linija. Međutim, pokazalo se da su problemi u javnom prijevozu putnika mnogo kompleksniji nego što se to u prvi mah činilo, te da bi pristup njihovom rješavanju trebalo da bude sistematičan i stručan.

1. 12. 2023.**Firma „Nasko“ iz Gračanice novi vlasnik Hotela „Grand“ u Sarajevu**

Radi se o firmi u vlasništvu biznismena iz Gračanice Nasmera Karića, koji je, kako je objavljeno u štampi, sebe postavio za prokuristu u hotelu „Grand“, dok je za direktoricu imenovana Advija Karić. Firma „Nasko“ se bavi trgovinom na veliko i malo i ugostiteljstvom (restoran i bazeni), te nekim vidovima transporta, a posjeduje i benzinske pumpe, te stanicu za tehnički pregled vozila. Prošle godine firma je ostvarila ukupan prihod od 33,5 miliona KM i dobit od 1,4 miliona KM. S druge strane, Hotel „Grand“ zapošljava 19 radnika, ima upisani kapital od 8,6 miliona KM, u prošloj godini ostvario je prihod od 961,7 hiljada KM, iskazavši gubitak od 3,1 hiljadu KM. Prethodni vlasnici hotela bili Alpenland Vermögensverwaltung iz Beča koja je imala 60 posto vlasništva i njen kapital je iznosio 5,1 milion KM, zatim prevoznicička firma F.S. Eurotrading Sarajevo i BH Banka sa kapitalom od 1,7 miliona KM. Nakon što su svi vlasnici prodali svoje udjele, ovom transakcijom „Nasko“ je postao 100-postotni vlasnik. Podaci o prenosu osnivačkih udjela – promjeni osnivača društva, promjeni u strukturi osnovnog kapitala društva, lica ovlaštenog za zastupanje – direktora društva, te upisu lica ovlaštenog za zastupanje – prokuriste, upisani su u sudski registar Općinskog suda u Sarajevu. (Izvor: www.akta.ba, pregledano 3. 12. 2023.)

14. 12. 2023**U Gračanici održan Kolokvij o životu i djelu Muhameda Sejida Mašića**

U organizaciji Muftijstva tuzlanskog i Medžlisa islamske zajednice, u Gračanici je, održan Kolokvij (Okrugli sto) na temu „Muhamed Sejid Mašić - alim, publicista, prevodilac i pisac tariha – 110 godina od rođenja (1913. – 1978).“ Riječ je o jednom

učenom Gračanliji, talentovanom pjesniku i prevodiocu sa arapskog jezika i vrlo plodnom publicisti, koji je ispisivao stihove i na našem i na arapskom jeziku, pisao tarihe, prevodio velike islamske autore, a i sam obrađivao teme iz islamske filozofije i duhovnosti. Ostavio je iza sebe nepregledno duhovno bogatstvo, nažalost „otkriveno“ tek poslije njegove smrti, preciznije nakon završetka rata i agresije na Bosnu i Hercegovinu (1992 – 1995), najviše zahvaljujući njegovom sinu, prof. dr. Izetu Mašiću.

U ime organizatora, skup je otvorio i moderirao glavni imam Medžlisa Islamske zajednice Gračanica Smajo ef. Mustafić, a o životu i djelu Muhameda Mašića govorio je njegov sin Izet Mašić, koji je objavio 15 publikacija iz velike intelektualne zaostavštine svoga oca.

Muhamed Mašić je počeo objavljivati svoje prve stihove i prevode sa arapskog jezika još kao đak Gazi Husrev-begove medrese, koju je završio 1935. godine. Pojavljivao se u više arapskih i domaćih listova, između ostalih i u islamskoj reviji „Hikjmet“ u Tuzli. Poslije Drugog svjetskog rata pisao je tekstove s područja islamske duhovnosti i filozofije, zatim publicistiku i memoarske zapise. U njegovoj poeziji, kako je svojevrmeno pisao Ešref ef. Kovačević, posebno mjesto zauzimaju hronogrami - tarihi i to ne samo zbog težine njihove forme, već i zbog dokumentarne, a posebno pjesničke vrijednosti tih stihova. U okolnostima u kojima se našao poslije Drugog svjetskog rata, Muhamed Mašić nije mogao objavljivati svoje rukopise. Da ih nije prikupio i počeo objavljivati Izet Mašić, vjerovatno bi propali. Proživio je tegoban život, tipičan za intelektualca u provinciji, koji je bio pod stalnom paskom režima (u dva navrata je ležao i u zatvoru), a neshvaćen u sredini u kojoj je živio.

Drugi govornik na ovom skupu bio je Mehmedalija Hadžić, sa temom „Kurʿanski i hadiski sadržaj i značenja u pjesmi „Istiniti



Slijeva nadesno: Smajo ef. Mustafić, Izet Mašić, Mehmedalija Hadžić, Omer Hamzić

snovi“ autora Muhameda Seida Mašića“. U toj proročanskoj pjesmi *“o susretu s Gazi Husrev-begom u snu”*, nastaloj pedesetih godina prošlog stoljeća, u vrijeme Mašićevog prvog tamnovanja u Zenici, ispejvani su stihovi u kojima su, kako je rekao Hadžić, isprojicirani događaji koji su nam se desili tokom agresije na našu domovinu. “Stoga mislim da će Muhamed Mašić biti otkrovenje za buduće istraživače ovog specifičnog književnog stvaralaštva”, zaključio je Hadžić.

Zbog spriječenosti da dođe na skup, Neval Hadžićević je u pismenoj formi i kao tonski zapis priložio svoju temu pod naslovom *„Tarihi i poezija Muhameda Seida Mašića na arapskom jeziku“*. Sa tim svojim tekstom autor upotpunjuje naša saznanja o tarihima kao gotovo zaboravljenoj, pjesničkoj vrsti i Muhamedu Mašiću kao svestranom i darovitom stvaraocu “visoke učenosti i duboke umnosti” i možda jednom od posljednjih naših tarihopisaca.

Ovaj skup je tematski zaokružio prof. dr. Omer Hamzić, izlaganjem pod naslovom *„Muhamed Sejid Mašić na stranicama „Gračaničkog glasnika“, putem kojih se Mašić „vratio“ iz zaborava. Već u prvom broju, koji je izašao u proljeće 1996. godine, objavljeni*

su njegovi do tada pronađeni stihovi (mahom iz predratnog „Hikjmeta“). Nakon drugog broja, Redakcija, „Glasnika“ organizovala je i simpozijum pod naslovom *„Muhamed Mašić i njegovo djelo“* na kojem je sudjelovalo nekoliko eminentnih autora. U narednih pet-šest brojeva na stranicama ovog časopisa objavljena su sva izlaganja sa tog simpozijuma, te više priloga drugih autora o Mašiću kao i mnoštvo njegovih autorskih tekstova. Od ukupno 55 do sada odštampanih brojeva „Gračaničkog glasnika“, u 12 su prezentirani najvažniji rukopisi Muhameda Mašića kao i tekstovi o Muhamedu Mašiću, koji su kasnije priređivani kao posebne publikacije. „U narednom periodu nastojat ćemo objaviti više kritičkih tekstova referentnih autora o stvaralaštvu Muhameda Mašića“, poručio je Hamzić i kao glavni urednik „Gračaničkog glasnika“ obećao da će izlaganja sa ovog skupa objaviti u narednim brojevima.

Na kraju se prisutnim obratio i Muftija tuzlanski dr. Vahid-ef. Fazlović, koji je pohvalio nastojanje da se otrgnu od zaborava likovi i djela svih zaslužnih intelektualaca i alima iz bošnjačkog naroda, koji su ostavili iza sebe značajnije tragove po našim čaršijama i džematima.



Dušmani, Bosna, 1992-1995. (Mevludin Ekmečić, "Genocid nad Bošnjacima 1992-1995. – crtežom i tekstom", Galerija portreta Tuzla, Bosanska riječ, Wupertal, 1996. 143)